

現代生活藝術系列

華嚴經疏論纂要 13

— 如來現相品之二 —

華藏淨宗學會印贈

大方廣佛華嚴經疏論纂要卷第十三

五臺山清涼國師澄觀疏鈔

太原方山長者李通玄 論

閩鼓山私淑比丘道需纂要

如來現相品第二之一

○第三所召雲奔文分爲三。第一同會道場第二
現自在用。第三聲光自述。今初文三。初總明

爾時十方世界海一切衆會。蒙佛光明所開覺已。各
共來詣毗盧遮那如來所。親近供養。

○二所謂下別顯。三如是等下總結。別中十方卽

爲十段。今初東方。一一方中。皆有十事。一定方
所謂此華藏莊嚴世界海東

○二土海

次有世界海。名清淨光蓮華莊嚴

○三世界

彼世界種中。有國土。名摩尼瓔珞金剛藏

○四佛名

佛號法水覺虛空無邊王

○五主菩薩

於彼如來大衆海中。有菩薩摩訶薩。名觀察勝法蓮

華幢

○六眷屬數

與世界海微塵數諸菩薩俱

○七至佛所

來詣佛所

○八興供雲

各現十種菩薩身相雲。徧滿虛空而不散滅。復現十種雨。一切寶蓮華光明雲。復現十種須彌寶峯雲。復現十種日輪光雲。復現十種寶華瓔珞雲。復現十種一切音樂雲。復現十種末香樹雲。復現十種塗香燒

香衆色相雲復現十種一切香樹雲如是等世界海
微塵數諸供養雲悉徧虛空而不散滅

疏其東方供雲應有十種而但九者塗香燒香二
文合故言各現者王伴一一皆現也重重無礙各
徧虛空一一可觀名不散滅

○九申禮獻供

現是雲已向佛作禮以爲供養

○十化座安坐

卽於東方各化作種種華光明藏師子之座於其座
上結加趺坐

疏十方化座體相各異。而皆同名蓮華藏師子之座者。師子之義已見上文。蓮華藏言通有三意。一約菩薩表含藏開敷故。二約所詮將說依報故。三約諸會通顯華嚴故。上下還於本方坐者。佛圓迴身皆見面故。異於餘宗。但八方故。

○第二南方

此華藏世界海南。次有世界海。各一切寶月光明莊嚴藏。彼世界種中。有國土名無邊光圓滿莊嚴佛號。普智光明德須彌王。於彼如來大衆海中。有菩薩摩訶薩。名普照法海慧。與世界海微塵數諸菩薩俱來。

詣佛所各現十種一切莊嚴光明藏摩尼王雲徧滿
虛空而不散滅復現十種雨一切寶莊嚴具普照耀
摩尼王雲復現十種寶燄熾然稱揚佛名號摩尼王
雲復現十種說一切佛法摩尼王雲復現十種衆妙
樹莊嚴道場摩尼王雲復現十種寶光普照現衆化
佛摩尼王雲復現十種普現一切道場莊嚴像摩尼
王雲復現十種密燄燈說諸佛境界摩尼王雲復現
十種不思議佛刹宮殿像摩尼王雲復現十種普現
三世佛身像摩尼王雲如是等世界海微塵數摩尼
王雲悉徧虛空而不散滅現是雲已向佛作禮以爲

供養。卽於南方各化作帝青寶閣。浮檀金蓮華藏師子之座。於其座上結加趺坐。

○第三西方

此華藏世界海。其次有世界海。名可愛樂寶光明。彼世界種中。有國土名出生上妙資身具。佛號香燄功德寶莊嚴。於彼如來大衆海中。有菩薩摩訶薩。名月光香燄普莊嚴。與世界海微塵數諸菩薩俱來詣佛所。各現十種一切寶香衆妙華樓閣雲。徧滿虛空而不散滅。復現十種無邊色相衆寶王樓閣雲。復現十種寶燈香燄樓閣雲。復現十種一切真珠樓閣雲。復

現十種一切寶華樓閣雲復現十種寶瓔珞莊嚴樓閣雲復現十種普現十方一切莊嚴光明藏樓閣雲復現十種衆寶末間錯莊嚴樓閣雲復現十種衆寶周徧十方一切莊嚴樓閣雲復現十種華門鐸網樓閣雲如是等世界海微塵數樓閣雲悉徧虛空而不散滅現是雲已向佛作禮以爲供養卽於西方各化作真金葉大寶藏師子之座於其座上結加趺坐

○第四北方

此華藏世界海北次有世界海名毗瑠璃蓮華光圓滿藏彼世界種中有國土名優鉢羅華莊嚴佛號普

智幢音王於彼如來大衆海中。有菩薩摩訶薩。名師子奮迅光明。與世界海微塵數諸菩薩俱來詣佛所。各現十種一切香摩尼衆妙樹雲。徧滿虛空而不散滅。復現十種蜜葉妙香莊嚴樹雲。復現十種化現一切無邊色相樹莊嚴樹雲。復現十種一切華周布莊嚴樹雲。復現十種一切寶燄圓滿光莊嚴樹雲。復現十種現十種現一切栴檀香菩薩身莊嚴樹雲。復現十種現往昔道場處不思議莊嚴樹雲。復現十種衆寶衣服藏如日光明樹雲。復現十種普發一切悅意音聲樹雲。如是等世界海微塵數樹雲。悉徧虛空而不散滅。

現是雲已向佛作禮以爲供養。卽於北方各化作摩尼燈蓮華藏師子之座。於其座上結加趺坐。

○第五東北方

此華藏世界海東北方。次有世界海。名閻浮檀金玻瓈色幢。彼世界種中有國土名衆寶莊嚴。佛號一切法無畏燈。於彼如來大衆海中。有菩薩摩訶薩。名最勝光明燈。無盡功德藏。與世界海微塵數諸菩薩俱。來詣佛所。各現十種無邊色相寶蓮華藏師子座雲。徧滿虛空而不散滅。復現十種摩尼王光明藏師子座雲。復現十種一切莊嚴具種種校飾師子座雲。復

現十種衆寶鬘燈燄藏師子座雲。復現十種普雨寶
瓔珞師子座雲。復現十種一切香華寶瓔珞藏師子
座雲。復現十種示現一切佛座莊嚴摩尼王藏師子
座雲。復現十種戶牖階砌及諸瓔珞一切莊嚴師子
座雲。復現十種一切摩尼樹寶枝莖藏師子座雲。復
現十種寶香間飾日光明藏師子座雲。如是等世界
海微塵數師子座雲。悉徧虛空而不散滅。現是雲已。
向佛作禮以爲供養。卽於東北方。各化作寶蓮華摩
尼光幢師子之座。於其座上結跏趺坐。

○第六東南方

此華藏世界海東南方。次有世界海。名金莊嚴。瑠璃光普照。彼世界種中。有國土名清淨香光明。佛號普喜深信王。於彼如來大衆海中。有菩薩摩訶薩。名慧燈普明。與世界海微塵數諸菩薩俱來。詣佛所。各現十種一切如意王。摩尼帳雲。徧滿虛空。而不散滅。復現十種帝青寶。一切華莊嚴帳雲。復現十種一切香摩尼帳雲。復現十種寶燄燈帳雲。復現十種示現佛神通說法。摩尼王帳雲。復現十種現一切衣服莊嚴色像。摩尼帳雲。復現十種一切寶華叢光明帳雲。復現十種寶網鈴鐸音帳雲。復現十種摩尼爲臺蓮華。

爲網帳雲。復現十種現。一切不思議莊嚴具色像帳雲。如是等世界海微塵數衆寶帳雲。悉徧虛空而不散滅。現是雲已。向佛作禮。以爲供養。卽於東南方。各化作寶蓮華藏師子之座。於其座上結跏趺坐。

○第七西南方

此華藏世界海西南方。次有世界海。名日光徧照。彼世界種中。有國土名師子日光明。佛號普智光明音。於彼如來大衆海中。有菩薩摩訶薩。名普華光燄鬚。與世界海微塵數諸菩薩俱來。詣佛所。各現十種衆妙莊嚴寶蓋雲。徧滿虛空而不散滅。復現十種光明。

莊嚴華蓋雲。復現十種無邊色。真珠藏蓋雲。復現十
種。出一切菩薩。悲愍音摩尼王蓋雲。復現十種衆妙
寶。燄髮蓋雲。復現十種妙寶嚴飾垂網鐸蓋雲。復現
十種摩尼樹枝莊嚴蓋雲。復現十種日光普照摩尼
王蓋雲。復現十種一切塗香燒香蓋雲。復現十種栴
檀藏蓋雲。復現十種廣大佛境界普光明莊嚴蓋雲。
如是等世界海微塵數衆寶蓋雲。悉徧虛空而不散
滅。現是雲已。向佛作禮。以爲供養。卽於西南方。各化
作帝青寶光燄莊嚴藏師子之座。於其座上結跏趺
坐。

○第八西北方

此華藏世界海西北方。次有世界海。名寶光照耀。彼世界種中。有國土名衆香莊嚴。佛號無量功德海光明。於彼如來大衆海中。有菩薩摩訶薩。名無盡光摩尼王。與世界海微塵數諸菩薩俱來詣佛所。各現十種一切寶圓滿光雲。徧滿虛空而不散滅。復現十種一切寶燄圓滿光雲。復現十種一切妙華圓滿光雲。復現十種一切化佛圓滿光雲。復現十種十方佛土圓滿光雲。復現十種佛境界雷聲寶樹圓滿光雲。復現十種一切瑠璃寶摩尼王圓滿光雲。復現十種一

念中現無邊衆生。相圓滿光雲。復現十種演一切如
來大願音圓滿光雲。復現十種演化一切衆生音摩
尼王圓滿光雲。如是等世界海微塵數圓滿光雲。悉
徧虛空而不散滅。現是雲已。向佛作禮以爲供養。卽
於西北方。各化作無盡光明威德藏師子之座。於其
座上結跏趺坐。

○第九下方

此華藏世界海下方。次有世界海。名蓮華香妙德藏。
彼世界種中。有國土名寶師子光明照耀。佛號法界
光明。於彼如來大衆海中。有菩薩摩訶薩。名法界光。

燄慧與世界海微塵數諸菩薩俱來詣佛所各現十
種一切摩尼藏光明雲徧滿虛空而不散滅復現十
種一切香光明雲復現十種一切寶燄光明雲復現
十種出一切佛說法音光明雲復現十種現一切佛
土莊嚴光明雲復現十種一切妙華樓閣光明雲復
現十種現一切劫中諸佛教化衆生事光明雲復現
十種一切無盡寶華藥光明雲復現十種一切莊嚴
座光明雲如是等世界海微塵數光明雲悉徧虛空
而不散滅現是雲已向佛作禮以爲供養即於下方
各化作寶燄燈蓮華藏師子之座於其座上結跏趺

坐

○第十上方

此華藏世界海上方。次有世界海名摩尼寶照耀莊嚴。彼世界種中。有國土名無相妙光明。佛號無礙功德。光明王於彼如來大衆海中。有菩薩摩訶薩名無礙力精進慧。與世界海微塵數諸菩薩俱來詣佛所。各現十種無邊色相。寶光燄雲。徧滿虛空而不散滅。復現十種摩尼寶網光燄雲。復現十種一切廣大佛土莊嚴光燄雲。復現十種一切妙香光燄雲。復現十種一切莊嚴光燄雲。復現十種諸佛變化光燄雲。復

現十種衆妙樹華光燄雲。復現十種一切金剛光燄雲。復現十種說無邊菩薩行摩尼光燄雲。復現十種一切真珠燈光燄雲。如是等世界海微塵數光燄雲。悉徧虛空而不散滅。現是雲已。向佛作禮以爲供養。卽於上方。各化作演佛音聲光明蓮華藏師子之座。於其座上結跏趺坐。

○第三總結

如是等十億佛刹微塵數世界海中。有十億佛刹微塵數菩薩摩訶薩。一一各有世界海微塵數諸菩薩衆。前後圍繞而來集會。是諸菩薩。一一各現世界海

微塵數種種莊嚴諸供養雲。悉徧虛空而不散滅。現是雲已。向佛作禮。以爲供養。隨所來方。各化作種種寶莊嚴師子之座。於其座上結跏趺坐。

〔疏〕文有其八。一畧示前文云如是等。二總明海數。謂十億刹塵。以上來所列。是華藏鱗次之海口。光各照一億十方。故有十也。上二段前別中所無。三結主四結伴。五結來至。六結興供。七結禮獻。八結安坐。旣爲總結。故缺定方。已至會中。故闕初海等三事。鈔已至會中者。一土海。二世界海。三佛名。非別從彼來。故此不說。

○大科第二現自在用

如是坐已。其諸菩薩身毛孔中。一一各現十世界海。微塵數一切寶種種色光明。一一光中。悉現十世界海。微塵數諸菩薩。皆坐蓮華藏師子之座。

〔疏〕現自在用。卽爲歎德。謂塵塵近佛。念念益生。文有其八。一。明諸菩薩毛孔現光。二。光現菩薩。三。菩薩入塵。四。塵含廣利。五。利有如來。六。菩薩往供。七。助佛揚化。八。所化成益。初二可知。

此諸菩薩。悉能徧入一切法界。諸安立海所有微塵。

〔疏〕三中言安立海所有微塵者。畧有二義。一。一切施設依正等塵。二。稱真故。二約觀心。衆生意識。

所緣卽是法界。例依名相分別而轉。是謂安立。妄故爲塵。體皆可依。是名大利。皆有覺性。是曰如來。此名菩薩證入衆生性海。

彼一一塵中。皆有十佛世界微塵數諸廣大刹。

疏四中可知

一一刹中。皆有三世諸佛世尊。

疏五隨世俗故。說有三世。全稱性故。並在塵中。此諸菩薩。悉能徧徃親近供養。

疏六中供養者。通財及法。

於念念中。以夢自在示現法門。開悟世界海微塵數。

衆生念念中。以示現一切諸天。歿生法門。開悟世界
海微塵數衆生。念念中。以說一切菩薩行法門。開悟
世界海微塵數衆生。念念中。以普震動一切刹。歎佛
功德神變法門。開悟世界海微塵數衆生。念念中。以
嚴淨一切佛國土。顯示一切大願海法門。開悟世界
海微塵數衆生。念念中。以普攝一切衆生言詞。佛音
聲法門。開悟世界海微塵數衆生。念念中。以能雨一
切佛法雲法門。開悟世界海微塵數衆生。念念中。以
光明普照十方國土。徧法界。示現神變法門。開悟
世界海微塵數衆生。念念中。以普現佛身。徧法界。

一切如來解脫力法門。開悟世界海微塵數衆生。念
念中。以普賢菩薩建立一切衆會道場海法門。開悟
世界海微塵數衆生。如是普徧一切法界。隨衆生心
悉令開悟。

疏七於念念下。助佛揚化

念念中。一國土。各令如須彌山微塵數衆生。墮惡
道者。永離其苦。各令如須彌山微塵數衆生。住邪定
者。入正定聚。各令如須彌山微塵數衆生。隨其所樂
生於天上。各令如須彌山微塵數衆生。安住聲聞辟
支佛地。各令如須彌山微塵數衆生。事善知識具衆

福行各令如須彌山微塵數衆生。發於無上菩提之心。各令如須彌山微塵數衆生。趣於菩薩不退轉地。各令如須彌山微塵數衆生。得淨智眼。見於如來。所見一切諸平等法。各令如須彌山微塵數衆生。安住諸力。諸願海中。以無盡智而爲方便。淨諸佛國。各令如須彌山微塵數衆生。皆得安住毗盧遮那廣大願海。生如來家。

疏八念念中下。所化成益。於中賢首對前開悟。以三義釋之。一別配釋。二圓通釋。三各別釋。初者。謂以前十法門。對後所成十益。一門得其一益。二三

前卻。餘竝如次。一以夢自在門。夢中警覺造惡衆生。令得斷惡。免苦益故。二以菩薩行門。令入正定。三以現諸天歿生門。令生天受樂。以放逸則歿。尅念便生故。上三人天乘。四以動刹現無常。令厭以歎佛神變。令忻成二乘益。下皆大乘。五以嚴刹大願。令修福求向。六以攝生言詞。令發大心。以佛音聲。卽同體大悲故。七以佛雲雨法。令入菩薩不退之位。已上三位。在地前三賢。八以照徧滿法界土。及神變。令得初地。已上智眼。見平等法。九以佛普現徧法界解脫力。令得八地。已上大力大願無盡。

智淨國土益十以普賢建道場。令住佛果大願海。言生如來家者。入佛果位故生。非是初地以上生佛家也。二圓通者。此上十法於此十益。一一徧通。謂或一法成十益。或十法成一益。如是互徧。無所障礙。三各別者。謂前十法門。各自開悟。世界海微塵數衆生。此以法爲益。後十益。但言須彌塵數。不言刹塵之國。則是已身以人爲益。旣各別釋。則夢自在門。亦顯一切皆如夢故。延促等無礙。故云自在餘竝可知。

鈔三各別者。前之二釋。一則一別對。二則互相總對。今不對前。則七八兩段義不相關。七約法開悟。八約身成益。身法不同。故不相對。上言對前爲三者。前二相由。故名爲。

對今與前別。此上菩薩法化。始從放光。終於得益。亦是對前。順數八段。逆推十二。重疊無盡。一其十須彌塵數。衆生得益。方在一國。餘一切土皆爾。故云一一國各令等也。二此一切土益。在一念時中。餘一切念時皆爾。故云念念中也。三如是念念之益。方一法門所開悟。一一法門皆爾。四彼多法門。方是一念所用。餘念念所用法門亦爾。五彼多念法門。方論一廣利。如一廣利如是。十刹塵數廣利皆爾。六彼多廣利。方論一塵內。如一塵。一切安立中諸塵亦然。七如上諸塵。方是一安立海。如一安立海。徧法

界諸安立海亦然。八徧法界安立海中業用。方是
一化菩薩所化。如一化菩薩。十世界海化菩薩。一
一皆然。九諸化菩薩方是一光所現。如一光。一一
光亦然。十彼十刹塵數光。方是一毛孔現。如一
毛孔。徧身一一毛孔皆然。十一彼徧身毛孔方是
一菩薩。如一菩薩。有如是十億佛刹微塵數。箇世
界海微塵數菩薩。徧身毛孔皆爾。十二上來所明
十一重作用。方論來此一會。如此一會。於餘佛會
亦復如是。此後一段。偈文具之。此上菩薩下。上約
順釋。今乃逆收。以
彰淡又上十二重。一一開之爲二。便成二十四重
妙耳。

且如一念望一切念。卽是二義。類例相似。合之爲一。餘十一重。準此思之。如是重疊無盡。各周法界。唯智頓觀。非心識境。華嚴海會。大用皆然。

○第三聲光自述

爾時諸菩薩光明中。同時發聲。說此頌言。

諸光明中出妙音

普徧十方一切國

演說佛子諸功德

能入菩提之妙道

〔疏〕前旣光聲召命。今亦光聲自述。菩薩位極用窮。深廣。若非自述。時衆難知。十頌分二。初一總明。兼

陳說處

劫海修行無厭倦

令苦衆生得解脫

心無下劣及勞疲

佛子善入斯方便

盡諸劫海修方便

無量無邊無有餘

一切法門無不入

而恒說彼性寂滅

三世諸佛所有願

一切修治悉令盡

卽以利益諸衆生

而爲自行清淨業

〔疏〕後九別顯德用殊勝。文分爲三。初三通顯體用

自在初偈。悲智相導。度衆生而不疲。鈔悲智相導者悲無大智

卽成。夢見。夢見悲者。則於生成有疲厭心。今劫海

修行而不疲厭。明有智導。智若無悲。則多趣寂。名

爲下劣。今脫衆苦。心無下劣。卽次偈。空有雙觀。入

有悲導矣。悲故能度。智故無疲。

法門而常寂。次偈空有雙觀者。空有雙觀。即是前
寂。即是後半。由前觀有。入一。後偈物我無滯。故化
切法門。由前觀空。而常寂滅。
他而自清。後偈三世二利。是願皆修。斯則亦
爲物我無滯。便成後半。化他自淨。

一切諸佛衆會中

普徧十方無不往

皆以甚深智慧海

入彼如來寂滅法

一一光明無有邊

悉入難思諸國土

清淨智眼普能見

是諸菩薩所行境

菩薩能住一毛端

徧動十方諸國土

不令衆生有怖想

是其清淨方便地

一一塵中無量身

復現種種莊嚴刹

一念歿生普令見

獲無礙慧莊嚴者

三世所有一切劫

一剎那中悉能現

知身如幻無體相

證明法性無礙者

疏次五頌別敘前現自在與前影畧

與前影畧者前有入塵

此中即無此有任一毛端徧動諸刹一身徧十方塵塵多身刹那頓現等彼皆畧無

智觀寂滅即顯不唯來此會也二身光普入智眼

徧觀三任一毛端徧動諸刹况乎於上處寶蓮華

四塵塵多身門門化異舉一歿生門可以例諸五

念劫無礙結由證淡念劫既融故於念念能作法

性無礙者分與無分皆無礙故謂證理不唯無分

故在一切處而全在一法一切法亦然各有四句
 身等不唯分故常在此而無在思之分與無分者
 卽是事無分是理理事既融故無障礙各有四句
 者事理皆四故理四句者一無分限以徧一切故
 二非無分以一中法中無不具故三具分無分謂分
 無分一味以全體在一法而一切處恆滿故如觀
 一塵中見一切處法界四俱非二門故事四句者一體絕
 待故圓融故二義一相非二門故事四句者一體絕
 分以隨自事相有分齊故二無分以全體卽理故
 大品云色前際不可得後際不可得此卽無分也
 三俱以前二義無礙是故具此二義方是事故四
 俱非以二義融故平等故二相絕故身等不唯分
 故者謂由上諸義理性不唯無分故在一中而全在一切處而
 全體在於一內不唯分故常在此處恆在他方不唯無分
 處事法不唯分故常在此處恆在他方不唯無分
 故徧一切處而不移本位又由理性不唯無分故
 不在一事外不唯分故不在一事內事法不唯分
 故常在此處而無在不唯無分故常在他處而無

不在。是故無在無不在。而在此在彼。無有障礙也。然此中有兩對事理。各有二四句。乃成八句。疏中但出二句。謂上云證理不唯無分故。卽初對約理一句。其一切法皆爾者。舉例耳。今云身等不唯分者。卽是後對中約事一句。以身等卽事也。餘之六句。畧而不出。故上總言各二四句。意中含取。

普賢勝行皆能入

一切衆生悉樂見

佛子能住此法門

諸光明中大音吼

疏後一偈結廣有歸。普賢勝行皆入。非獨向來所陳。故能光中演斯自在。

論第三從爾時十方世界海已下一段長行并偈頌。是十方世界海蒙光所照。皆來雲集示法分。於此段中大意有十。一明佛光普照。二明十方衆來。

三明來已興供。四明興供不同。五明衆海影像相
叅。六明大衆自他同異自在。七明大衆毛孔出光。
八明光出菩薩。九明菩薩同事利生。十明衆生發
心得果。此之十事。如文可知。

○大文第四現瑞表法。上所現相。但召有緣衆集
將陳。故重現斯瑞。瑞文有三。初光示法主。二現
華表義。三現衆表教。法藉人弘。故先明主義爲
教本。故在教前。今初示主。

爾時世尊欲令一切菩薩大衆得於如來無邊境界
神通力故。放眉間光。此光名一切菩薩智光明普照。

耀十方藏。其狀猶如寶色燈雲。徧照十方一切佛刹。其中國土。及以衆生。悉令顯現。又普震動諸世界網。一一塵中。現無數佛。隨諸衆生。性欲不同。普雨三世一切諸佛妙法輪雲。顯示如來波羅蜜海。又雨無量諸出離雲。令諸衆生永度生死。復雨諸佛大願之雲。顯示十方諸世界中。普賢菩薩道場衆會。作是事已。右繞於佛。從足下入。

疏文分爲六。一意。二體。三名。四相。五展。六收。今初可知。二放。眷間光。卽光體也。眷間者。表離二邊。故於體不計有無。二邊於義不著。常無常等諸法相。

邊於行不習苦樂二邊於道不住邪正二邊於人
不執因果二邊於教不說世出世二邊於諦不見
真俗二邊於化不定權實二邊是故爲衆放眷間
光。鈔於體不計有無者。一切法體不出有無於義
是不著常等。就一有上自有常無常之義謂生滅
是無常義不生滅是常義又不生滅是無常義等
只要一有法上。卽有常無常我無我苦之與樂淨
非淨等。故示諸法相徧於行不習苦樂者。斷見計
樂行常見計苦行等。住正道者。則不分別是邪是
正因果交徹。故世間性空。卽是出世隨順觀察世
諦卽入第一義。故於諦常自二於解常自一。未堪
實化。權爲說三。大根旣熟。便爲說實。三此光下辨
權是卽實之權。實是卽權之實故。三此光下辨
光名菩薩智光者。令得能知智也。普照十方藏者。
令照所知境也。藏有三義。一智光含德無盡故。二

以十方刹海各於塵內重含諸刹故。三亦通於五藏以言智光故。照初二藏。令菩薩證。照次二藏。令菩薩成。證則得於涅槃。成則得於菩提。照第五藏。令化令淨。三中後二如下業中。照初二藏者一如來藏在纏含果法

故。二自性清淨藏。在纏不染。故此二本有。故令其證。照次二藏者。一法身藏。謂果位為功德所依。故二出世間。上上藏。謂出纏超過。二乘菩薩。故並已出纏。故致成言。照第五藏者。以第五法界藏。通因通果。外持一切染淨。有為名為法界。內含一切恆沙功德。故復名藏。以有因。故化之。以有染。故淨之。餘如前說。三中後二者。即藏有三義。中後二義。下動刹網。一塵中現無數佛。即第二義。兩三法雨。即第三義。妙法輪雲。即如來藏。便是所證。二出離雲。即令化令淨。三大願雲。令得令成。義。四其狀下。顯相。謂色如燈雲。猶日月洞照。周徧潤澤。雨

法雨故如相海品。

謂色如燈雲者。相海品云。如來眷間有大人相。名徧法界。光明

雲。摩尼寶華以爲莊嚴。放大光明。具衆寶色。猶如

日月。洞徹清淨。其光普照十方國土。於中顯現一

切佛身。復出妙音。宣揚諸法。五徧照下。展卽光業。用於中分五。

一所照分齊。謂盡十方一切佛刹。二其中下。光所

現。謂土及衆生。三又普下。動刹網。以諸世界重疊

影現。交互相當。猶如網孔。四一一下。塵現如來。五

隨諸下。隨機雨法。畧舉三法。皆下所顯。初法輪雲。

示其所行。二出離雲。示其所度。三大願雲。示說法

主。謂將說普法。令知法王大願。普周刹塵內故。第

六作是下。收則示有終歸。證從佛流。眷間出光。修

因順果。故須右繞。自下升高。故從足入。履佛所行方證入故。

○第二現華表義

爾時佛前有大蓮華。忽然出現。其華具有十種莊嚴。一切蓮華所不能及。所謂衆寶間錯。以爲其莖。摩尼寶王。以爲其藏。法界衆寶。普作其葉。諸香摩尼。而作其鬚。閻浮檀金。莊嚴其臺。妙網覆上。光色清淨。於一念中。示現無邊諸佛神變。普能發起一切音聲。摩尼寶王。影現佛身。於音聲中。普能演說一切菩薩所修行願。

疏文有二別。一總標華現。爲坐所現。中方衆故。通表所詮佛華嚴故。別表華藏佛所淨故。故於佛前出此蓮華。旣通表華嚴。亦具同時具足等十門。及教義等。而其本意。正表義耳。忽然現者。依理起事。難測量故。鈔亦具同時者。十門可思。但法是所依。對所依體事。由此華事。爲理所融。故具十對。令同時等。而賢首約義釋成云。一教義。謂見此蓮華。能生解故。二事理。華卽是事。舉體同真故。三境智。華是所觀。同智性故。四行位。是萬行華。隨位別故。五因果。因事之華。覽成果故。六依正。全是所修。亦能依故。七體用。體同真性。用應機故。八人法。恆覽於人攝。爲法故。九逆順。逆同五熱。順十度故。十感應。徧應一切。亦能感故。而其本意者。以十玄十對。凡舉一事。必具十玄。凡一玄門。必收十對。泛明一法。一圓收故。若作義者。但是傍來。然其本意。唯表

義耳。忽然現。一其華下。顯具德嚴。文亦有二。先標者。隨難牒釋。二其華下。顯具德嚴。文亦有二。先標十種。顯德無盡。後所謂下。別列十句。前六體備衆德。今初蓮子住處。有含藏之義。故名爲藏。表示法門。一含一切。華藏之名。由此而立。後於一念下。四句妙用自在。一念况多。摩尼寶王。卽前藏體。影現佛身。卽依正無礙。旣發多聲。聲皆演法。

○第三現衆表教

此華生已。一念之間。於如來白毫相中。有菩薩摩訶薩名一切法勝音。與世界海微塵數諸菩薩衆。俱時而出。右繞如來經無量匝。禮佛足已。時勝音菩薩坐

蓮華臺。諸菩薩衆坐蓮華鬚。各於其上次第而坐。其一切法勝音菩薩了深法界。生大歡喜。入佛所行智。無疑滯。入不可測佛法身海。徃一切刹。諸如來所。身諸毛孔。悉現神通。念念普觀一切法界。十方諸佛。共與其力。令普安住一切三昧。盡未來劫。常見諸佛。無邊法界功德海身。乃至一切三昧解脫神通變化。

〔疏〕文畧有三。一現衆時。言一念者。華生無間。表教義相應。二現衆處。謂白毫中。表教從所證淨法界所流。爲衆教源。如白爲色本。三有菩薩下。正明衆現亦分爲三。一主屬齊現。徧詮諸法。故云一切所

詮圓滿。是曰勝音。圓教法門。必攝眷屬。故下文云。
 世界海微塵數。修多羅以為眷屬。權實無礙。故曰。
 俱時。二右繞下。申敬就座。主伴雖殊。並修因順果。
 故右繞如來。文義相隨。故依華坐。正助不等。臺鬚
 有差。上義依理明。故忽然而現。今教由人立。故眾
 從佛流。亦如涅槃。從牛出乳。鈔亦如涅槃等者。即
 第十四經。南本十三
云善男子。譬如從牛出乳。從乳出酪。從酪出生酥。
 從生酥出熟酥。從熟酥出醍醐。醍醐最上。若人服
 者。眾病皆除。所有諸藥。悉入其中。善男子。佛亦如
 是。從佛出十二部經。從十二部經出般若。若波羅密。從般若
 多羅。出方等經。從方等經出般若。若波羅密。從般若
 波羅密。出大涅槃。猶如醍醐。言醍醐者。喻於佛性。
 佛性者。即是如來。以是義故。說言如來。所有功德
 無量無邊。不可稱計。釋曰。彼約講法勝能。從微至

著今但依從佛出。三其一切下。彰其德業。王教是
教以况眷間出衆。宗。故偏歎主。文有十句。畧爲二解。一豎配十地。明
此普攝十地功德。一句一地。初地歡喜得智證如。
二地性戒是佛所行。三地多聞入法身海。四行道
品善友是依。五地雙行現通利物。六觀法界般若
現前。七功用已終。故佛與力。八無生無動。住三昧
心。九爲法師。見無邊法。十具於大盡。二昧等圓。初
地尙攝諸地功德。况於後後不具前前。二橫就極
位釋者。一理智了真。二量智入行。三證窮法身。四
常觀受用。五毛現神變。六念觀法門。七外感佛加。

八內安澹定九豎見來際十橫無不圓故此十句。

攝爲五對。若橫若豎能詮必具。故爲二釋。故此十句者重

收前釋。一如理如量對。二法身報身對。三身毛心念對。四外感內安對。五豎見橫圓對。

○大文第五稱揚佛德分。既現既至。任力稱揚。自

申罔極之情。顯佛無涯之德。文分爲二。初一眷

間菩薩讚。後十方菩薩讚。新衆纔集。佛便現

瑞。文不累書。故編成次。以讚德相類。結集併之

一處。乘現勝音之次。先舉勝音之偈。後十菩薩

卽如次十方。昔人不曉斯文。便將後十爲勝音

眷屬。非唯章疏之失。亦乃翻譯有違。何者。且眷

間出衆。卽主伴皆讚。十方來衆。寂無一言。主伴
禮儀。一何疎索。况準法界品例。來者皆有讚詞。
細尋菩薩之名。與前十方。如次相似。但由譯人
不審致令名小乖差。至下文中。一一對辨。鈔二
新衆
纔集下。明讚亦二。先正明。亦是通妨。謂有問言。
若以後十爲十方菩薩讚者。十方先來。何以後
讚。故今通云。現瑞與讚。二皆同時。則勝音與十
方讚亦同時。自是結集集讚一處。又應問言。旣
是結集排次。居然合排十方在前。何以向後。故
釋云。乘前讚勝音德次。是故先舉勝音讚耳。

○今初着間勝音菩薩讚

卽於衆中。承佛威神。觀察十方而說。頌曰

〔疏〕文分二。先說偈儀。後正說偈下十例。然偈中總

相讚佛。亦含諸問。思之可知。鈔亦含諸問者。文含四。十句且收十海。初偈。卽佛海。次偈。演說海。三。一偈。變化海。一。毛示現故。四。一偈。衆生海。五。一偈。世界海。六。一偈。法界安立海。七。一偈。波羅密海。八。一偈。佛壽量海。已證佛地。必有壽故。尤。一偈。解脫海。皆賢開覺。已離障故。已獲神通作用。解脫故。十一。一偈。名號海。身雲普徧隨物立名故。十海既爾。攝餘句問例然。故令思之。

佛身充滿於法界

普現一切衆生前

隨緣赴感靡不周

而恒處北菩提座

疏十頌分三。初三直就佛歎。次六約衆歎佛。三有

一偈雙結主伴。初中三偈。皆歎如來體用無礙於

中初一不動本而周徧。則十身圓融徧四法界。鈔

身圓融者。以但言佛身故通十身。但云法界故通四界。以體卽理。用卽是事。體用無礙。卽事理無礙。

卽一卽徧卽事事無礙。又初句體徧。次句明用第
三句明用徧。第四句不動本也。本有二種。一眞身
爲本。本體自徧以用如體。故不動本而普徧。二應
用之中。自有本末。菩提座身卽本。周十方卽末。故
下不起樹王而昇四天。正明不動本而周徧。今明
雖徧法界而處此座。明不壞末而歸本。此二不相
離。故疏以不動本而周徧釋不壞徧而歸本。

如來一一毛孔中

一切刹塵諸佛坐

菩薩衆會共圍繞

演說普賢之勝行

如來安處菩提座

一毛示現多刹海

一一毛現悉亦然

如是普周於法界

疏後二不壞小相而廣容。上則事如理故。此則事
含理故。於中前一偈半。一毛攝三世間。後半類餘。

謂徧法界內。皆有佛身。無有一毛不含刹海。又一
毛表解脫門。諸佛菩薩智所住故。現多刹海者。門
門皆是淨土因故。鈔上則事如理故者。菩提座身
是事。以如理故周徧。此則事含
理者。一毛是事。無不包故。由理有二義。一無處不
徧。二無法不包。猶如虛空。具包徧義。今事如理故。
具上一二義。即事事無礙中。事理融通門也。
又一毛者。約觀心釋。一毛內空。能容受故。

一一刹中悉安坐 一切刹土皆周徧

十方菩薩如雲集 莫不咸來詣道場

一切刹土微塵數 功德光明菩薩海

普在如來衆會中 乃至法界咸充徧

疏次六偈約衆歎者。聖賢輔翼。顯王勝故。六偈總

明王伴皆徧於中初二總身總相徧

法界微塵諸刹土

一切衆中皆出現

如是分身智境界

普賢行中能建立

一切諸佛衆會中

勝智菩薩僉然坐

各各聽法生歡喜

處處修行無量劫

已入普賢廣大願

各各出生衆佛法

毗盧遮那法海中

修行克證如來地

普賢菩薩所開覺

一切如來同讚喜

已獲諸佛大神通

法界周流無不徧

疏後四總身徧別中。既微細難思。故唯普智方知。

普行方立。鈔初二總身者然有四句謂一總徧總中。然所徧通依正且約能徧為正所徧為依依正各有總別。正總即全身別即眼耳乃至一毛依總即全一國土別即若樹若石乃至一塵初但云刹中安坐故是總身總相徧後明身徧塵中之土總徧別中。

一切刹土微塵數

常現身雲悉充滿

普為衆生放大光

各雨法雨稱其心

疏三雙結可知

○第二十方菩薩讚德十方即為十投今初東方

蓮華光菩薩

爾時衆中復有菩薩摩訶薩。名觀察一切勝法蓮華

光慧王承佛威神。觀察十方而說頌曰

〔疏〕言衆中者。大衆海中。前列名處。名觀察勝法蓮

華。幢幢相高出。主是超勝。此喻相似。光慧卽是所

喻幢體。鈔言衆中者。爲揀昔解。以爲勝音眷屬讚

衆海中

如來甚深智 普入於法界 能隨三世轉

與世爲明導 諸佛同法身 無依無差別

隨諸衆生意 今見佛色形 具足一切智

徧知一切法 一切國土中 一切無不現

〔疏〕偈中讚佛真應二身。密答佛地。如來智等攝佛

地故。十頌分二。初三讚真。後七讚應。讚真必體用
雙美。讚應唯約用明。欲顯門差。實非體外。今初也。
於中初一讚智身。次一讚法身。後一雙結。智含四
智。法卽法界。五法具矣。智中上半正體證真。下半
後起隨俗。又句各一智。初句大圓鏡智。行相深細
故。次句平等性智。自他平等。卽法界故。次句妙觀
察智。於自共相。無礙轉故。末句成所作智。成就利
他導世事故。鈔又句各一智者。上二讚法身中。上
半體相皆同。同有二義。一本性法身體同。言無依
者。無住本故。無差別者。體無二故。二已證法身相

同。力無畏等皆無異故。此則無礙慧身。不依一切。

離諸分別。是無差別。力無畏等者。卽問明品文。經云。殊法常爾。法王唯一。法

一切無礙人。一道出生。一切諸佛身。同共一法。身。一心一智慧。力無畏亦然。言相同者。卽相似名。

同非謂共也。此則無礙者。上以無住本。釋無依。無依是理。故無住卽實相之異名。今以智慧釋無依。

故出現品云。一切佛法依慈悲。慈悲復依方便。立方便。依智智依慧。無礙慧身無所依。離諸分別者。

上釋無差別。約理無二。今釋無差別。但心無分別耳。故無差別。與無分別。有通有局。局則無差別。是理。

無分別。約智。通則理亦得。名無分別。故問明品云。佛利無分別。無憎亦無愛。智亦得名。無有差別。謂。

無差別。智爲能證。故今用。下半用同。能現能生身。通義以無分別釋無差別。

土智影。皆無二故。卽法身無色。應物現形。能現能生身。土

智影皆無二。故者。卽唯識大圓鏡智之能。亦如上引。卽法身者。引證此語。正是肇論論云。法身無色。

應物現形。般若無知。對緣而照。若取本據。卽是經云。佛眞法身。猶若虛空。應物現形。如水月中。下經亦云。佛以法爲身。清淨如虛空。所現衆色形。令入此法中。三雙結者。上半結智。上句根本。下句後得。下半結法。但舉其用。體通上下。以智契如故。金光明說如如。及如如智爲法身故。

佛身及光明 色相不思議 衆生信樂者

隨應悉令見 於一佛身上 化爲無量佛

雷音徧衆刹 演法深如海 一一毛孔中

光網徧十方 演佛妙音聲 調彼難調者

如來光明中 常出深妙音 讚佛功德海

及菩薩所行 佛轉正法輪 無量無有邊

所說法無等 淺智不能測 一切世界中

現身成正覺 各各起神變 法界悉充滿

如來一一身 現佛等衆生 一切微塵刹

普現神通力

疏後七讚應分三初一隨樂現應不思議者隨緣

無邊故光明覺云億那由劫共思量色相威德轉

無邊等次四身光演法初一化身演法望前應身

卽重化也。鈔望前應身者應身對法報應是化身

應身。涅槃受供於其毛端。現多化佛卽重化也。次二毛光演法後一結歎

難量。法輪義如別說。後二偈成道起通。上皆圓融。亦有十身。且從一義耳。

○第二南方法喜菩薩

爾時衆中。復有菩薩摩訶薩。名法喜。慧光明。承佛威神。觀察十方。而說頌曰。

〔疏前雲集中。名普照法海慧。會義亦同。光明卽照法故。十頌歎佛寂用。應機德。答前境界。法身顯現。卽分齊境。無生無體。卽所觀境。衆生國土。皆所化境。〕

佛身常顯現
法界悉充滿
恒演廣大音

普震十方國 如來普現身 徧入於世間

隨衆生樂欲 顯示神通力 佛隨衆生心

普現於其前 衆生所見者 皆是佛神力

光明無有邊 說法亦無量 佛子隨其智

能入能觀察

〔疏〕於中分三。初四依真起應。於中分二。先一顯真。

佛身常者。第一義常。出三世故。智符於理。湛然常

照顯者。離二障故。現者。常在前故。不同衆生自體

常也。鈔初一偈顯真者。此約法報無礙之身為真佛也。第一義常者。本有常也。智符於理。湛然

常照者。修成合本有也。若依法相。後常是相續常。今依法性宗。冥符於理。同理常也。法界悉

充滿者。諸根相好。一。無邊。無限。福智所莊嚴故。
諸根相好。一。無邊者。即自受用身果。無限。福智
所莊嚴者。即自受用因。故唯識云。二。受用身。此有
二種。一。自受用。謂諸如來。二。無數劫修集無量福
慧資糧所起無邊真實功德及極圓淨常徧色身。
相續湛然。盡未來際。恆自受用廣大法樂。釋曰。以論對疏。居然可知。次二句音恆用
音。恆自受用廣大法樂故。下三偈起用。初一音隨
物樂。次一感應道交。後一法光無際。初一音隨物
樂下。二義皆
通他受用身及變化身。故唯識云。二。他受用。謂諸
如來由平等智。示現微妙淨功德身。居純淨土。為
任十地諸菩薩眾現大神通。轉正法
輪。決眾疑網。令彼受用大乘法樂。

佛身無有生 而能示出生 法性如虛空
諸佛於中住 無住亦無去 處處皆見佛

光明靡不周 名稱悉遠聞 無體無住處

亦無生可得 無相亦無形 所現皆如影

〔疏〕二有三偈。體用無礙。於中初二句約相。無生現

生。次二句約性。無住而住。次一偈約用。無去住而

普周。後偈體用雙拂。謂無體拂上無生。無生為佛

法體故。今體即非體。鈔無生為佛法體者。諸經論中皆詮無生之理。故淨名不

二發始明之。楞伽經說一切不生中論不生為宗。忘宗體傳大士亦云。佛法以無生為體。無著為宗。忘

相為因。涅槃為果。諸文非一。無住處者。拂約性二句。亦無生可

得。拂示生句。下半拂前第二偈約用。用如影故。無住

處者。拂約性二句者。以約性云。法性如虛空。諸佛於中住。似有住處。今謂法性如空。則無所住。况體

無生安有能住。不住諸法。方住法性。故上文云。諸佛於中住。金剛經云。應無所住而生其心。若心有住。則為非住。大品云。若住一切法。不住般若。波羅密。不住一切法。方住般若。波羅密。故大般若會。會之初。皆先明無住。

佛隨衆生心 爲興大法雲 種種方便門

示悟而調伏 一切世界中 見佛坐道場

大衆所圍繞 照耀十方國 一切諸佛身

皆有無盡相 示現雖無量 色相終不盡

疏三有三偈。明真應無盡。一法雲無盡。二衆會無

盡。三身相無盡。無盡相言兼真身故。終不盡者。全

同體故。鏡對萬形。一真體無盡。此復二種。一十蓮

華藏之色相故。一一一色相體無窮盡。湛然不變。故經云。如來妙色常安隱。不爲時節劫數遷。大聖曠劫行慈悲。獲得金剛不壞體勝。鬘云。如來色無盡。智慧亦復然。

○第三西方香燄菩薩

爾時衆中。復有菩薩摩訶薩。名香燄光普明慧。承佛威神。觀察十方而說頌曰

〔疏〕前名月光香燄菩薩莊嚴。此中光卽月光。明慧卽是智慧莊嚴。十頌讚佛身含衆海。卽答加持問。由加能入故

此會諸菩薩 入佛難思地 一一皆能見
一切佛神力 智身能徧入 一切刹微塵

見身在彼中	普見於諸佛	如影現衆刹
一切如來所	於彼一切中	悉現神通事
普賢諸行願	修治已明潔	能於一切刹
普見佛神變	身住一切處	一切皆平等
智能如是行	入佛之境界	已證如來智
等照於法界	普入佛毛孔	一切諸刹海
一切佛國土	皆現神通力	示現種種身
及種種名號	能於一念頃	普現諸神變
道場成正覺	及轉妙法輪	一切廣大刹
億劫不思議	菩薩三昧中	一念皆能現

一切諸佛土 一一諸菩薩 普入於佛身
無邊亦無盡

〔疏〕於中前九讚衆海。則佛德可知。後一結德歸佛。前中初一總。餘八別。別中二前四平徧一切。於中初一智身入刹塵。次一色身普現用。後二釋成前義。一普賢行圓故。二身心平等故。後有四偈。明微細入於毛孔刹中而作用故。後一結中。非唯一會一切菩薩皆入佛身。方爲讚佛。

○第四北方師子奮迅菩薩

爾時衆中。復有菩薩摩訶薩。名師子奮迅慧光明承。

佛威神。徧觀十方而說頌曰

〔疏〕此同本名。但加慧字。然此十頌。歎佛依體起用。轉大法輪。答前佛行。佛以轉法化生爲其行故。

毗盧遮那佛 能轉正法輪 法界諸國土

如雲悉周徧 十方中所有 諸大世界海

佛神通願力 處處轉法輪 一切諸刹土

廣大衆會中 名號各不同 隨應演妙法

如來大威力 普賢願所成 一切國土中

妙音無不至 佛身等刹塵 普雨於法雨

無生無差別 現一切世間 無數諸億劫

一切塵刹中 往昔所行事 妙音咸具演

十方塵國土 光網悉周徧 光中悉有佛

普化諸羣生 佛身無差別 充滿於法界

能令見色身 隨機善調伏 三世一切刹

所有衆導師 種種名號殊 爲說皆令見

過未及現在 一切諸如來 所轉妙法輪

此會皆得聞

〔疏〕文中分三。初二句總。次半偈。并後八偈。其八偈半別。後一偈結。別中讚佛十化。前法界諸國土二句。現受生化。處處受生。身雲徧故。今十方中所有。

等一偈讚神通化。末句雖云轉法。意在通用。三有三句讚業果化。一切諸刹名號不同者。示同趣類業報名字故。上三依身。四隨應演妙法者。卽辨揚化。隨應則能斷彼疑故。五一偈勸讚勵化。妙音讚勵故。六一偈慶慰化。普雨法雨。令彼進修無生法故。上三語業。七有一偈領受意化。領問受取。演昔行故。八有一偈決擇意化。決擇有情心行差別。及揀諸法性相不同。方能普化故。九一偈發起意化。發起宿善及三乘大行。爲善調故。十有一偈造作意化。建立佛法事義種種。皆令見故。依實起用。卽

是化身。故說化身無別心色。此之十化。與佛地經

次第無違。但令相融。不違經旨。

鈔十化者。即佛地經說。佛身有十化。

初。依身輪起三種化。一受生化。謂受最後身。二神通化。謂諸變等。三業果化。謂受金剛等。次依語輪

起二種化。一辨揚化。謂轉法輪。斷疑答難。二讚勵化。謂讚勝勸學。三慶慰化。謂有進修。或能斷證。隨

喜慶慰。意化有四。一領受意化。謂領問受取等。二決擇意化。謂觀有行情。行差別。揀擇諸法。性相不

同。三發起意化。謂能發起宿世善根。及令二乘發大行等。四造作意化。謂能建立諸法事義。是故當

知。依實起用。即是化身。故說化身無別心色。釋曰。上即論文。疏文具用。欲會釋經。少有添減。但觀向

引。自分疏中。主客之言。末後一偈。結歸斯會。可知。

○第五東北方海菩薩

爾時眾中。復有菩薩摩訶薩。名法海慧功德藏。承佛

威神觀察十方而說頌曰

〔疏〕前衆集中。名最勝。光明燈無盡。功德藏。法海。可當最勝。光明義與慧同。功德藏名。前後無別。無盡二字。前有後無。十頌讚佛攝勝眷屬。答佛力問。寄讚菩薩。實由佛力。故結云。在力地中。

此會諸佛子 善修衆智慧 斯人已能入

如是方便門 一一國土中 普演廣大音

說佛所行處 周聞十方刹 一一心念中

普觀一切法 安住真如地 了達諸法海

一一佛身中 億劫不思議 修習波羅蜜

及嚴淨國土	一一微塵中	能證一切法
如是無所礙	周行十方國	一一佛剎中
往詣悉無餘	見佛神通力	入佛所行處
諸佛廣大音	法界靡不聞	菩薩能了知
善入音聲海	劫海演妙音	其音等無別
智周三世者	入彼音聲地	衆生所有音
及佛自在聲	獲得音聲智	一切皆能了
從地而得地	住於力地中	億劫勤修行
所獲法如是		

〔疏〕文中初一。智滿得法。卽爲總相。如是方便門者。

此有二意。一指前。謂具前三輪之化。故能周徧。一
一國土。二卽下九別。爲如是方便也。餘九別相共
讚七事。一讚普演大音。有三種大。一者處大。一
國故。二者義大。說佛行故。三者體大。周聞十方故。
二讚時無空過。念念觀法證真實故。三能入勝處。
諸佛身中修淨國故。四於染無礙。塵中證法而周
行故。五能入佛境。見佛神力。入行處故。行處有二。
一智行處。謂十力境。二佛化處。謂器及衆生。六有
三頌。善入音聲。初入大音。次入妙音。後入一切音。
七一頌。善知諸地。言從地者。卽出心也。而得地者。

卽在入也。方地中者。卽佛地也。所獲法者。結上方便也。

○第六東南方慧燈菩薩

爾時衆中。復有菩薩摩訶薩。名慧燈普明。承佛威神。觀察十方而說頌曰

疏名全同前。十頌讚諸菩薩悟入深廣。由三昧力。見佛三昧。卽答三昧問也。

一切諸如來 遠離於衆相 若能知是法

乃見世導師 菩薩三昧中 慧光普明了

能知一切佛 自在之體性 見佛真實體

則悟甚深法	普觀於法界	隨願而受身
從於福海生	安住於智地	觀察一切法
修行最勝道	一切佛刹中	一切如來所
如是徧法界	悉見真實體	十方廣大刹
億劫勤修行	能遊正徧知	一切諸法海
唯一堅密身	一切塵中見	無生亦無相
普現於諸國	隨諸衆生心	普現於其前
種種示調伏	速令向佛道	以佛威神故
出現諸菩薩	佛力所加持	普見諸如來
一切衆導師	無量威神力	開悟諸菩薩

法界悉周徧

〔疏〕於中分四。初二歎見佛真體。一見佛離相。二見佛自在。言離衆相者。般若云。離一切諸相。則名諸佛。慈氏論云。但離四相。卽離一切。謂名義自性及差別也。言自在者。由菩薩定慧雙運。故見佛自在也。次四頌明悟法。一證淡理法。願力而現。二悟多行法。福智成形。三達果法。體無不徧。四了教法。淡廣難知。三有二頌歎身業普應。一淡。二廣。云堅密者。齊佛體用。堅卽金剛之身。密謂三密之一。卽一而多。故徧一切。卽大而小。故現塵中。無功之應。故

無相而現。若約法門。此身卽如來藏性也。不可破壞。故堅。淡而難見。故密。衆生塵心。無不皆具。本自有之。故曰無生。體絕百非。故曰無相。衆生六根。是謂諸國。四後二頌。歎得佛加持。一此佛力。二餘佛力。

○第七西南方華燄髻菩薩

爾時衆中。復有菩薩摩訶薩。名華燄髻。普明智。承佛威神。觀察十方。而說頌曰。

〔疏〕前列名處。云普華嚴髻。少同多異。十頌歎佛攝生自在德。答前自在問。

一切國土中 普演微妙音 稱揚佛功德

法界悉充滿 佛以法爲身 清淨如虛空

所現衆色形 令入此法中 若有深信喜

及爲佛攝受 當知如是人 能生了佛智

諸有少智者 不能知此法 慧眼清淨人

於此乃能見 以佛威神力 觀察一切法

入住及出時 所見皆明了 一切諸法中

法門無有邊 成就一切智 入於深法海

〔疏〕文分爲三。初六攝生無遺。次二寂用無礙。後二

大用無涯。今初文二。初二能攝。謂身語淡廣。前偈

語。後偈身。身中上半體。客塵不染。故下半用。隨物見異故。亦是釋疑。爲物現相。不乖如空。疑者疑云。既以法爲佛身。清淨如虛空。何緣現金色等。云何令人悟於虛空。答有三意。一體雖無相。爲物現相。物宜見故。隨他意耳。二若不見相。云何令人悟於無相。如不因言。豈顯無言之理。上二意。卽爲物現相。句中通之。三如虛空言。取其清淨無相。非離相求。相卽無相。故不乖空。故下經云。佛住甚深真法性。寂滅無相。同虛空。而於第一實義中。示現種種所行事。所行利益衆生事。皆因法性而得有相。與無相無差別。入於究竟皆無相。故不乖無相。相卽無相耳。後四偈所攝。初偈何人能了。內信外攝者。次偈以何眼見。唯勝非劣。次偈了見何法。謂一切法。地地三心。地地三心者。卽入任出。下當廣說。後偈何位究竟。菩薩地盡。至入佛海。

安住佛國土 出興一切處 無去亦無來

諸佛法如是 一切衆生海 佛身如影現

隨其解差別 如是見導師

〔疏〕次二寂用無礙中。初偈用徧出興體無來往。後

偈卽用恆寂隨解自差

一切毛孔中 各各現神通 修行普賢願

清淨者能見 佛以一一身 處處轉法輪

法界悉周徧 思議莫能及

〔疏〕後二大用無涯者。初一一毛皆普現通。後一一

身各徧轉法

○第八西北方無盡光菩薩

爾時衆中復有菩薩摩訶薩名威德慧無盡光承佛威神觀察十方而說頌曰

〔疏〕前名無盡光摩尼王。此云威德慧。卽摩尼王。法喻異耳。十頌歎佛出現說法皆周徧德。答無畏問。說法無畏故。

一一佛刹中 處處坐道場 衆會共圍繞

魔軍悉摧伏 佛身放光明 徧滿於十方

隨應而示現 色相非一種

〔疏〕於中分三。初二總顯身光徧應。次七辨其所作。

後一結用歸本

一一微塵內

光明悉充滿

普見十方土

種種各差別

十方諸刹海

種種無量刹

悉平坦清淨

帝青寶所成

或覆或傍住

或似蓮華合

或圓或四方

種種衆形相

法界諸刹土

周行無所礙

一切衆會中

常轉妙法輪

佛身不思議

國土悉在中

於其一切處

導世演真法

所轉妙法輪

法性無差別

依於一實理

演說諸法相

佛以圓滿音

闡明真實理

隨其解差別

現無盡法門

〔疏〕辨所作中分二。初三明光照無遺。後四演法周徧。一徧塵內外法界剎中。二徧佛身中一切剎內。三明所轉性相。四卽能轉圓音。

一切剎土中 見佛坐道場 佛身如影現
生滅不可得

〔疏〕後一結用歸本。不可得故。

○第九下方普明菩薩

爾時衆中。復有菩薩摩訶薩。名法界普明慧。承佛威神。觀察十方而說頌曰。

〔疏〕前名法界光燄慧。此云普明。卽前光燄。十頌讚佛境勝用。菩薩能入答神通問。文云各各現故。

如來微妙身。色相不思議。見者生歡喜。

恭敬信樂法。佛身一切相。悉現無量佛。

普入十方界。一一微塵中。十方國土海。

無量無邊佛。咸於念念中。各各現神通。

〔疏〕於中二。前三顯佛境勝用。先半偈標其體。謂妙身色相。後二頌半辨其用。

大智諸菩薩。深入於法海。佛力所加持。

能知此方便。若有已安住。普賢諸行願。

見彼衆國土	一切佛神力	若人有信解
及以諸大願	具足深智慧	通達一切法
能於諸佛身	一一而觀察	色聲無所礙
了達於諸境	能於諸佛身	安住智所行
速入如來地	普攝於法界	佛刹微塵數
如是諸國土	能令一念中	一一塵中現
一切諸國土	及以神通事	悉現一刹中
菩薩力如是		

〔疏〕後七菩薩能入。謂入佛境界。於中三。初二具德。故知見。次三知見成益。後二結用速疾。並可知。

○第十上方精進力菩薩

爾時衆中復有菩薩摩訶薩。名精進力無礙慧。承佛威神。觀察十方而說頌曰

〔疏〕此與前名顛倒而已。十頌讚佛圓音現身。神變自在。答無能攝取問。謂此願力普周。無能令不取故

佛演一妙音 周聞十方刹 衆音悉具足

法雨皆充徧 一切言詞海 一切隨類音

一切佛刹中 轉於淨法輪 一切諸國土

悉見佛神變 聽佛說法音 聞已趣菩提

疏於中分三初三頌歎佛圓音雨法德。然具十義。
 一唯一妙音。一梵音故。二徧聞一切。稱法性故。三
 此一卽多。事理融故。四彼一一音。雨多法雨。四
雨者。隨前一音。卽說四諦。十五彼法各具一切文。
二因緣。六波羅密。因果等法。七此音各各徧一切處。
 八所說各顯性淨之理。九三句各令一切普得見
 聞。十一句各各皆得究竟之益。上之十義。從一妙
 音。展轉開之。具十無盡。方曰圓音。文處可見。文處
者。上之八義。句各一義。唯第九義。具於
三句。十亦一句。故十二句。而有十義。

法界諸國土 一一微塵中 如來解脫力

於彼普現身 法身同虛空 無礙無差別

色形如影像 種種衆相現 影像無方所

如空無體性 智慧廣大人 了達其平等

佛身不可取 無生無起作 應物普現前

平等如虛空

疏次四歎佛現身無礙德。初偈解脫力。故現處周細。次偈法身力。故現相卽虛。後二偈以般若德發揮前偈。初偈釋下半。言影像者。顯無方所故。謂光東則影西。光西則影東。質對像生。求無所從。質謝像亡。去無所至。故此影像。卽空無體。鈔言影像者。此句標下別。

釋之。離其影像以爲二。喻影取光影。喻故云光東
 影西等。然光影喻自有二意。一以若身若樹等以
 喻物機。日月之光以喻佛智。所見之影。喻物色形
 如瞿師羅之短質。佛智對之爲三尺之影。無邊身
 之長質。佛智對之爲窮上界而有餘之影。今不取
 此義。二質喻法身。無二相故。光喻機感。隨其東西
 所感異故。影喻色形。隨機感光而東西故。今取此
 義云。無方所。二以像一種爲鏡像。喻故云質對像
 生。無從無去。卽無方所。故此影像。後偈釋上半言
 下。雙結二喻。無方所言。意明空耳。

如空者不可取等故。故雖現形猶如水月平等如

空。言如空者。等取四義。謂此偈中五義。如空。一不
 可取。無物可取。智覽無性故。二無生。非從無之
 有故。三無起作。非新成故。四應物現前。無有一物
 不對空故。隨器大小孔隙之異故。五平等。十方虛
 空皆不可量。二際虛空同一相故。如來五義者。一
 離相故。二眞常故。三湛寂故。上三寂然不動。四卽
 感而遂通。五體相用等。佛佛相望。平等無二故。雖
 現形者。經云。佛眞法身。猶若虛空。應物現形。如水

中月。此義佛佛平等，是故經云平等如空。

十方所有佛 盡入一毛孔 各各現神通

智眼能觀見 毗盧遮那佛 願力周法界

一切國土中 恒轉無上輪 一毛現神變

一切佛同說 經於無量劫 不得其邊際

[疏]後三歎佛神變自在德。一則毛孔廣容。二則願能普徧。三舉少況多。又上畧配十句。其中具有四十句意。不能繁指。

○第六大科結通無窮

如此四天下道場中以佛神力。十方各有一億世界。

海微塵數諸菩薩衆而來集會。應知一切世界海。一四天下諸道場中。悉亦如是。

〔疏〕分二。初舉此。二應知下。類彼。言四天下者。意在

閻浮。言總意別。既以結通菩薩雲集。尤顯上歎是

彼十方。遠方便竟。鈔既以結通者。謂若是勝音眷

道場中。以佛神力。十方各有一億世界。海微塵數諸菩薩衆而來集會。取明知上。是十方菩薩歎佛

德耳。

論第四從爾時世尊欲令一切菩薩大衆得如來

無邊境界。已下一段。長行有二十八行。半經四百八十

言於中分爲兩段。一從初十行經明光之德。第二

十八行半經。明蓮華出現。第一從初明光之德。大意有十。一令衆除疑獲益。二顯光出處。三顯光之名。四顯光之色。五明光所照遠近。六明光所照威動世界。七光照塵中現無數佛。隨根與益。八光兩十種法輪雲。九光明遶佛。十光入佛足輪。以成大衆信心。明足下是初信入故。說十種智佛。以爲自亡信心。以不動智爲首。第二爾時佛前已下十八行半經。明蓮華出現。於此一段文中。大意有十。一明華現所由。二明華具十種嚴飾。三明毫光出衆來坐。四明勝音菩薩爲主。餘者爲伴。五明上首菩

薩勝音之德。六明諸佛與勝音之力。七明勝音常見諸佛。八明勝音神變自在。九明勝音觀衆說頌。十明正申頌意。此之一段經文。如來眷間毫出光明。名一切菩薩。光明普照耀十方藏者。明是十地菩薩智滿中道教行之光。又毫相中出衆菩薩。有世界海微塵數。上首名曰一切法勝音。卽是其十地滿足中道果行。將此中道覺行悲智圓滿法界行門。毫塵刹海無障礙法。答前大衆三十七問。使令現在及以未來。信此十地法界因果法門。行滿十方。使令得益。是故經云。欲令一切菩薩大衆得

於如來無邊境界神通力故。放眷間光。又光體是法界之理。勝音大衆之海。是其法界之行用故。明從十住初心。以理智萬行體用不相離也。故從十信。卽與果行。令修理智體用法合然故。從果行信進。又勝音菩薩坐蓮華臺。諸菩薩衆坐蓮華鬚。明主伴萬行。明勝音一行徧一切行。一切萬行是勝音一行。明法界理智中圓滿無礙自在行故。還如前菩薩毛孔流光出菩薩行相似體性。一多重重自在。無體可礙。諸波羅密。一中具十。乃至無盡故。緣起互爲因果主伴自在故。以理智照之可見。大

意明法界行門。一行徧一切行。故同別自在。十正
申頌意。如文具明。無煩更釋。大體得大綱。紀卽得。
最下有三行經。五十一言明都結十方世界同然。
如來現相品竟。

大方廣佛華嚴經疏論纂要卷第十三

建安當陽皈戒弟子陳大俸法名太福
 同室謝氏禎娘法名太英男觀順興周
 觀慶興善孫音亮法增捐貲刊刻
 華嚴經如來現相品疏論纂要第十三
 卷永遠流通伏願色身康泰世澤綿延
 日升月恆永納亨嘉之慶源長流遠廣
 錫繁禧之福者
 康熙己未年九月望日
 華藏室謹題

范裕遠刊